

Di tia haiu bisognu

Mi si grapi lu cori
quannu sentu lu to prufùmu,
quannu mi talii mi veni
na vampata ca tuttu addùmu.

Lu cori di notti m'arrubbasti
cu amuri, senza timuri e malizzi.
Chinu chinu lu linchisti bedda mia
di buntà, passioni, vasati e carizzi.

Mbriacu sugnu di li to vasati,
fannu sciavuru di sciuri di rosa,
nni 'sta vita troppu cuntrastusa,
si stassi cu tia fussi natra cosa.

Chianciu, arridu, m'assettu,
mi susu, dormu e m'addivigliu
pinsannu a ddi beddi mumentu,
ora, mi veni lu scumpigliu.

Mi sentu tuttu smaniatu
ogni notti t'haiu nta lu sonnu,
m'abbrazzu strittu a lu cuscinu,
mi votu e mi rivotu e già è iornu.

Mi piaci ca ogni notti ti sonnu,
ma iu, ora, di tia haiu bisognu.

2020 Giuseppe Cardella